



# Engagement bei den LGS

## 1. Definitiounen

Mir schwätze bei de Guiden a Scoute vun Engagement, Versprieche, Engagementsfeier, Verspriechefeier, ... D'Ausdréck hänken zum Deel vun de Branchen of. Mir hun äis op folgend Definitioune festgeluegt:

Mat **Engagement** menge mir eng bestëmmt Haltung, déi een als Mënsch hu kann.

Mat "**Versprieche ofleën**" oder "**en Engagement huelen**" menge mir den Akt, wou de Jugendlechen/d'Kand sech virun der Unitéit, also der Famill, dem Ruddel, der Trupp, respektiv dem Clan, zu verschiddene Virsätz bekennt. Bei den ënneschte Branchë gët éischer vu Versprieche geschwat, während mir bei den ieweschte Branchen éischer soen: hatt/hien engagéiert sech.

## 2. Versprieche a Guidissem/Scoutissem

- Gesetz a Versprieche sin zwar nët déi eenzeg Punkten, duerch déi mir äis vun anere Bewegungen ënnerscheden, mee si si **wesentlech Bestanddele vum Guidissem/Scoutissem**.

- Fir de B. P. war d'Relioun esou eppes Grondleëndes an Einfaches, datt hien se als gläichbedeitend mat Gléck gesin huet. Deemno as si keng Viraussetzung fir sech ze engagieren, mee een, dee sech fir eng gutt Saach engagéiert, as, sénger Iwwerzeugung no, bewusst oder onbewusst scho **reliéis**.

- Mam Versprieche verflucht sech d'Kand/de Jugendlechen a Richtung vun **den Idealer vum Guidissem/Scoutissem** ze liewen. Hatt/Hien gët ugereeget, **eng perséinlech Versioun vum Versprieche** ze fannen, wou hatt/hien, déi Elementer erauswilt, mat denen hatt/hien eppes ufänke kann.

- D'Vesprieche as en **Ustouss** fir iwwer d'Haltung vun Engagement nozedenken. Et as eng Etapp an der **Progressioun vum Einzelnen**.

- D'Vesprieche geschitt an der Famill/Ruddel/Trupp/Clan, déi him beim Ustriewe vu séngen Idealer zur Säit stoe soll. D'Vesprieche as also eppes wat an déi **zwou Richtungen** - vu Guide/Scout zur Branche an zréck - geschitt.

## 3. D'Situatioun vun de Jugendlechen

Fir déi Jugendlech vun haut hun d'Liewesëmstänn geännert am Verglach mat virun z.B. 20 Joer:

- **D'Offer u Fräizäitaktivitéiten huet zougeholl**, de Jugendleche kann téschent ville Méiglechete wielen.

- Aktiv LGS-Memberen a Chef/tainen hun dacks nach **aner Fräizäitaktivitéiten** nieft Guiden a Scouten.

- **D'Schoul stellt aner Uspréch**, op den Ofschlossklasse sin si iwwer e ganz Joer gläichméisseg gefuerdert.

- D'Zuel vun de Lëtzebuenger **Studenten am Ausland** huet zougeholl, dat betrëfft och eis Chef/tainen.

- An der **Beruffswelt sin d'Ufuerderungen** an d'Méiglechete méi grouss gin.



#### 4. D'Haltung vun de Jugendlechen vis-à-vis vum Engagement

- Eng Rei Studien aus de leschte Joren (wéi z.B. d'SHELL-Studie vun 2002) iwwert d'Engagement vu Jugendlechen stelle fest, datt déi **Jonk genausou bereet wéi fréier sin**, sech ze engagéieren.
- Allerdéngs, an dat as dee wesentlechen Ennerscheed zu fréier, nët méi ënnert denen übleche Konditiounen an nët méi esou an denen traditionellen Institutiounen. Dës Tatsaach an och d'Striewe vum Jonken no **Selbstverwierklechung**, hun handfest gesellschaftlech Hannergrënn (Zwang zur Autonomie, Konsumkultur asw.), déi hie souzesou forcéieren, esou ze handelen, wéi hien handelt.
- An der däitscher Shell-Studie "Jugend' 02" gët festgestallt, dat d'Haaptmotiver fir dee Jonken, sech ze engagéieren, nët, wéi verschidde Leit mengen, z.B. eng materiell Entschiedegung as. Dës Motivatioun kënnt beim Jonken bal u leschter Plaz. Wesentlech fir hien as, datt **d'Engagement muss Spaass maachen**.
- Zwetens datt hien allzäit muss kënnen "ausklammen", an dréttens, datt hie ka selwer **matbestëmmen**, wat hien mécht.
- Iwwerduerchschnëttlech wichteg as fir hien och, datt Frënn dobäi matmaachen, datt et ëppes aneschters as wéi an der Schoul/op der Aarbecht, an datt hie **keng Virschreëfte gemaach kritt**.

#### 5. D'Auswierkungen op eise Verband

Fir déi Jugendlech fir en Engagement bei äis ze gewinnen musse mir also bedenken, datt si vlaicht manner automatesch en Engagement agin. Konkret musse mir oppassen, datt:

- si **Freed um Engagement vermëttelt** kréien virun allem vun den Branchechef/tainen, Gruppchef/taine, nationalen Equipen a Verbandsresponsabelen;
- si **Vertrauen entgëintbruecht** kréien, och wann emol eppes schif leeft;
- si vermëttelt kréien, datt si mat hirem Engagement **nët eleng** do stin;
- si op en Engagement **ugeschwat** gin an mat hinnen hir perséinlech Méiglechketen duerchdiskutéiert gin;
- si nët den Androck kréien, datt wann si de klenge Fanger gin, hinnen **d'ganz Hand** geholl gët;
- si vermëttelt kréien, datt hir Stëmm zielt an si **matdécidéiere** kënnen.

*(Positioun vum Verbandscomité vum 09.07.98)*



## Verspriechen resp. Engagement bei de verschiddene Branchen

|   | <b>Biber</b>   | <b>Wëllefcher</b>  | <b>AvEx</b>  | <b>CaraPio</b>   | <b>RaRo</b>   |
|---|--|--|--|--|---|
|   | Verspriechen   | Verspriechen   | Verspriechen   | Engagement   | Engagement  |
| <b>Orienteierung oder konkret Saach ?</b> | engagéiert sech bei allem matzemaachen, sou gutt wéi et geet   | éischter Orienteierung   | éischter Orienteierung   | Orienteierung, engagéiert sech fir an der Trupp matze-schaffen   | Orienteierung, Meditatioun iwver déiperséinlech Haltung zum Engagement  |
| <b>Zäitpunkt</b>                          | 2. Trimester an der Branche  | zum Schluss vum éischte Joer   | no wéinstens engem Joer  | 'tas kee präzisen Zäitpunkt festgeluegt, mee no wéinstens enger Entreprise an engem WE                             | no 1 Joer Clanliwien  |
| <b>Form</b>                               | Am Kader vun engem Fest, dat wa méiglech mat der éischer Sortie vun der Biberfamill verbonne gët, Foulard als Zeeche vum Engagement                  | Eng Feier. Den Text gët entweder zesummen oder vu jidferengem eenzel gelies. | feierleche Kader, an der Trupp, gët eenzel ofgeluegt                             | feierleche Kader, an der Trupp, gët eenzel ofgeluegt   | RaRowuecht, Parcours duerch d'Nuecht, deen individuell gemach gët a wou deen Einzelnen op verschiddenen Etappen Ustéiss zum Thema kritt |
| <b>Virberedung</b>                        | An der Biber-Famill, och duerch de Motto, deen d'Biber-Famill sech sicht   | an der Meute (Versammlung)   | an der Trupp (Versammlung)   | An der Trupp driwwer schwätzen, Gespréich mam Chef/taine, sech Gedanke maachen                                     | geschitt während der Rarowuecht   |
| <b>Text</b>                               | Konkret Fro vum Chef/taine un de Biber z.B. "Méchs du mat bei de Biber, hëls d'Regelen an, hëllef de an deels ?" - Äntwert matt "Jo" - Klappen - ... | Eng Propose läit vir, kann awer ëmgeännert gin                               | Eng individuell Versioun soll, mam offiziellen Text als Virlag, ausgeschafft gin | Den Einzelne soll säin egenen Text, mam offiziellen Text als Virlag, op séng perséinlech Astellung hi formuléieren | Den offiziellen Text as eng Orienteierung fir eng individuell Versioun vum Text   |
| <b>Spillt d'Gesetz eng Roll dobäi ?</b>   | Jo, duerch de Motto  | D'Punkte vum Gesetz kommen am Verspriechenstext vir                          | D'Punkte vum Gesetz kommen am Verspriechenstext vir                              | Déi verschidde Punkte vum Gesetz gin ernimmt   | Et gët un d'Ziler vum Verband erënnert  |

Gemeinsam fir all Branche as:

- d'Vespriechen/Engagement gët eng Kéier pro Branche gemaach,
- d'Vespriechen/Engagement as fraiwelleg (et gët awer bei de Biber a Wiwel ugeholl, datt si et matmaachen),
- d'Vespriechen/Engagement huet keng Konsequenz op d'Matbestëmmungsrecht,
- et gin och soss keng Sanktiounen oder Nodeler fir deen, dee kee Verspriechen ofleet,
- déi d'Vespriechen/Engagement maachen, kréien en Ofzeechen iwverreecht.